

**D<sup>a</sup> ROSA ANA PRADA QUEIPO, SECRETARIA DO CONCELLO DE AMES NA PROVINCIA DA CORUÑA**

**CERTIFICO:** QUE O PLENO DESTE CONCELLO LEVOU A CABO SESIÓN ORDINARIA O 27 DE DECEMBRO DE 2012, DESA REUNIÓN REDACTOUSE A CORRESPONDENTE ACTA QUE É DO TEOR LITERAL SEGUINTE.

**ACTA DA SESIÓN ORDINARIA LEVADA A CABO POLO PLENO DO CONCELLO O DÍA 27 DE DECEMBRO DE 2012.-**

No Salón de Sesiões da Casa do Concello de Ames, ás vinte horas (20:00) do día 27 de decembro de 2012, reúnese o Pleno do Concello en sesión ordinaria de primeira convocatoria, baixo a presidencia do Sr. alcalde don **Santiago V. Amor Barreiro** e coa asistencia dos/as señores/as concelleiros/as seguintes:

Grupo municipal Popular	Grupo municipal Socialista	Concelleiras/os non adscritas/os
M <sup>a</sup> Dolores Fernández Álvarez	Patricia Conde Lois	Olalla Alvite del Río
Manuel Ferreiro Santiago	José Francisco Doval Galán	María Pilar Candocia Pita
Ramón García Argibay	Isabel González Cancela	Susana Mallo Redondo
María González Gómez	Carmen Fraga Crespo	
M <sup>a</sup> Eugenia Martín Vicente	José Manuel Miñones Conde	
Emilio Martínez Carballeira		
Bernardo Moar Míguez		
Alfonso Rey López		
Alfredo Taboada Alvelo		
M <sup>a</sup> Carmen Verde Leboráns		

Asiste o señor **interventor** don José Antonio Rueda de Valenzuela.

Actúa como **secretaria** a titular da Corporación dona Rosa-Ana Prada Queipo.

Non asisten pero xustifican a súa ausencia os concelleiros don **Xosé Anxo Doval Rey** e don **José Pazos Balsa**.

**A) PARA DAR CONTA:**

**Punto Primeiro.- Dación de conta ao Pleno da Corporación dos decretos ditados pola Alcaldía dende a última sesión plenaria ordinaria**

O señor alcalde don **Santiago V. Amor Barreiro** informa á Corporación que os decretos ditados pola Alcaldía dende a última sesión plenaria ordinaria estiveron a disposición de todas/os as/os concelleiras/os na Secretaría Xeral, engadindo que o acceso aos decretos é libre para todas/os as/os concelleiras/os en calquera momento na Secretaría Xeral do Concello, e que con ocasión da convocatoria dos plenos ordinarios o que teñen a súa disposición é o libro oficial, en papel timbrado e numerado, ademais dos duplicados existentes nos distintos departamentos do Concello.

**B) PARA DELIBERACIÓN E ACORDO:**

**Punto Segundo.- Aprobación de actas anteriores.**

O señor alcalde don **Santiago V. Amor Barreiro** somete a consideración da corporación a aprobación da acta correspondente á sesión de 29 de novembro de 2012.

Intervén o concelleiro do grupo municipal socialista don **José Manuel Miñones Conde** para solicitar que conste nesa acta o que fixo o seu grupo municipal, que en primeiro lugar foi solicitar á Alcaldía un receso de 5 minutos para tomar a decisión de seguir ou non no pleno, receso que foi concedido, e, unha vez retomada a sesión plenaria á volta dese receso, solicitou que o pleno se suspendera debido a que non se daban as condicións óptimas para a súa celebración e non se escoitaba o que dicía o alcalde. Ao non ser atendida esta segunda solicitude, decidiron abandonar o pleno.

A solicitude deste engadido é aceptada pola señora secretaria.

A acta correspondente á sesión de 29 de novembro de 2012, co engadido feito a solicitude de don **José Manuel Miñones Conde**, é aprobada por maioría absoluta cos votos a favor dos 11 membros do grupo municipal popular e dos 5 membros presentes do grupo municipal socialista, e a abstención das 3 concelleiras non adscritas presentes.

Intervén para facer unha explicación de voto a concelleira non adscrita dona **Pilar Candocia Pita**, dicindo que a abstención dela e das súas compañeiras se debe a que ao non ter participado no pleno non ten sentido votar a acta dunha sesión na que non estiveron presentes.

**Punto Terceiro.- Declaración de non dispoñibilidade dos créditos de persoal destinados ao pagamento da paga extra de decembro de 2012.**

(.....)

Rematadas as intervencións o pleno da corporación, por maioría absoluta dos seus membros, cos votos a favor dos 11 representantes do grupo municipal popular e a abstención dos restantes membros da corporación municipal, adoptou os seguintes acordos :

**Primeiro.-** Declarar a non dispoñibilidade dos seguintes créditos que compoñen a paga extraordinaria dos empregados municipais correspondente ó mes de decembro de 2012 así como a paga adicional do complemento específico ou pagas adicionais equivalentes do mes de decembro:

GRUPO DE PROGRAMAS	SUBCONCEPTO		IMPORTE
132. SEGURIDADE E ORDE PÚBLICO	12001	SOLDOS GRUPO A2	1.209,22
132. SEGURIDADE E ORDE PÚBLICO	12003	SOLDOS GRUPO C1	23.423,24
132. SEGURIDADE E ORDE PÚBLICO	12006	TRIENIOS	1.576,02
132. SEGURIDADE E ORDE PÚBLICO	12101	COMPLEMENTO ESPECÍFICO	11.638,81
151. URBANISMO	12000	SOLDOS GRUPO A1	3.801,84
151. URBANISMO	12003	SOLDOS GRUPO C1	1.132,14
151. URBANISMO	12004	SOLDOS GRUPO C2	5.662,32
151. URBANISMO	12006	TRIENIOS	538,94
151. URBANISMO	12101	COMPLEMENTO ESPECÍFICO	5.444,96
151. URBANISMO	12103	OUTROS COMPLEMENTOS	296,97
151. URBANISMO	13000	RETRIBUCIÓN BÁSICAS	2.282,18
151. URBANISMO	13002	OUTRAS REMUNERACIÓN	1.086,93
163. LIMPEZA VIARIA	13000	RETRIBUCIÓN BÁSICAS	3.573,61
163. LIMPEZA VIARIA	13002	OUTRAS REMUNERACIÓN	1.507,44

163. LIMPEZA VIARIA	13100	LABORAL TEMPORAL	3.615,03
165. ALUMEADO PÚBLICO	13000	RETRIBUCIÓN BÁSICAS	2.099,44
165. ALUMEADO PÚBLICO	13002	OUTRAS REMUNERACIÓN	850,45
165. ALUMEADO PÚBLICO	13100	LABORAL TEMPORAL	1.273,63
169. OUTR. SERV. BENESTAR COMUN.	12001	SOLDOS GRUPO A2	1.209,22
169. OUTR. SERV. BENESTAR COMUN.	12003	SOLDOS GRUPO C1	1.062,00
169. OUTR. SERV. BENESTAR COMUN.	12004	SOLDOS GRUPO C2	943,72
169. OUTR. SERV. BENESTAR COMUN.	12006	TRIENIOS	93,57
169. OUTR. SERV. BENESTAR COMUN.	12101	COMPLEMENTO ESPECÍFICO	1.729,52
169. OUTR. SERV. BENESTAR COMUN.	13000	RETRIBUCIÓN BÁSICAS	5.358,25
169. OUTR. SERV. BENESTAR COMUN.	13002	OUTRAS REMUNERACIÓN	2.190,48
169. OUTR. SERV. BENESTAR COMUN.	13100	LABORAL TEMPORAL	8.118,60
171. PARQUES E XARDÍNS	13000	RETRIBUCIÓN BÁSICAS	2.843,64
171. PARQUES E XARDÍNS	13002	OUTRAS REMUNERACIÓN	1.159,83
172. PROTEC. MELLORA MEDIO AMB.	12001	SOLDOS GRUPO A2	1.209,22
172. PROTEC. MELLORA MEDIO AMB.	12004	SOLDOS GRUPO C2	943,72
172. PROTEC. MELLORA MEDIO AMB.	12006	TRIENIOS	105,99
172. PROTEC. MELLORA MEDIO AMB.	12101	COMPLEMENTO ESPECÍFICO	1.048,69
172. PROTEC. MELLORA MEDIO AMB.	13100	LABORAL TEMPORAL	4.455,87
231. ACCIÓN SOCIAL	12000	SOLDOS GRUPO A1	2.534,56
231. ACCIÓN SOCIAL	12004	SOLDOS GRUPO C2	1.887,44
231. ACCIÓN SOCIAL	12006	TRIENIOS	123,54
231. ACCIÓN SOCIAL	12101	COMPLEMENTO ESPECÍFICO	2.173,86
231. ACCIÓN SOCIAL	13000	RETRIBUCIÓN BÁSICAS	3.643,50
231. ACCIÓN SOCIAL	13002	OUTRAS REMUNERACIÓN	1.729,52
231. ACCIÓN SOCIAL	13100	LABORAL TEMPORAL	12.063,49
241. FOMENTO DO EMPREGO	12000	SOLDOS GRUPO A1	1.267,28
241. FOMENTO DO EMPREGO	12004	SOLDOS GRUPO C2	943,72
241. FOMENTO DO EMPREGO	12006	TRIENIOS	236,97
241. FOMENTO DO EMPREGO	12101	COMPLEMENTO ESPECÍFICO	1.086,93
241. FOMENTO DO EMPREGO	13100	LABORAL TEMPORAL	3.663,78
313. AC. PÚBLICAS RELAT. SAÚDE	12000	SOLDOS GRUPO A1	1.267,28
313. AC. PÚBLICAS RELAT. SAÚDE	12006	TRIENIOS	26,31
313. AC. PÚBLICAS RELAT. SAÚDE	12101	COMPLEMENTO ESPECÍFICO	585,69
321. ED. PREESCOLAR E PRIMARIA	13000	RETRIBUCIÓN BÁSICAS	1.022,60

321. ED. PREESCOLAR E PRIMARIA	13002	OUTRAS REMUNERACIÓNS	361,64
321. ED. PREESCOLAR E PRIMARIA	13100	LABORAL TEMPORAL	3.901,80
324. SERV. COMPLEM. EDUCACIÓN	12004	SOLDOS GRUPO C2	1.887,44
324. SERV. COMPLEM. EDUCACIÓN	12006	TRIENIOS	17,73
324. SERV. COMPLEM. EDUCACIÓN	12101	COMPLEMENTO ESPECÍFICO	888,68
324. SERV. COMPLEM. EDUCACIÓN	13100	LABORAL TEMPORAL	3.637,17
325. REDE MUNIC. COMEDOR. ESCOL.	12004	SOLDOS GRUPO C2	943,72
325. REDE MUNIC. COMEDOR. ESCOL.	12006	TRIENIOS	35,46
325. REDE MUNIC. COMEDOR. ESCOL.	12101	COMPLEMENTO ESPECÍFICO	444,34
325. REDE MUNIC. COMEDOR. ESCOL.	13100	LABORAL TEMPORAL	11.861,27
326. ESC. INF. MUN. BERTAMIRÁNS	13000	RETRIBUCIÓNS BÁSICAS	22.692,28
326. ESC. INF. MUN. BERTAMIRÁNS	13002	OUTRAS REMUNERACIÓNS	9.420,75
326. ESC. INF. MUN. BERTAMIRÁNS	13100	LABORAL TEMPORAL	2.688,41
327. ESC. INF. MUN. MILLADOIRO	13000	RETRIBUCIÓNS BÁSICAS	22.143,67
327. ESC. INF. MUN. MILLADOIRO	13002	OUTRAS REMUNERACIÓNS	9.353,27
332. BIBLIOTECAS E ARQUIVOS	13000	RETRIBUCIÓNS BÁSICAS	2.585,34
332. BIBLIOTECAS E ARQUIVOS	13002	OUTRAS REMUNERACIÓNS	1.361,78
332. BIBLIOTECAS E ARQUIVOS	13100	LABORAL TEMPORAL	5.277,23
334. PROMOCIÓN CULTURAL	12003	SOLDOS GRUPO C1	1.062,00
334. PROMOCIÓN CULTURAL	12006	TRIENIOS	250,03
334. PROMOCIÓN CULTURAL	12101	COMPLEMENTO ESPECÍFICO	566,04
334. PROMOCIÓN CULTURAL	13000	RETRIBUCIÓNS BÁSICAS	1.032,37
334. PROMOCIÓN CULTURAL	13002	OUTRAS REMUNERACIÓNS	444,34
334. PROMOCIÓN CULTURAL	13100	LABORAL TEMPORAL	12.943,85
339. XUVENTUDE	12001	SOLDOS GRUPO A2	1.139,08
339. XUVENTUDE	12006	TRIENIOS	50,70
339. XUVENTUDE	12101	COMPLEMENTO ESPECÍFICO	604,35
341. PROMOC. E FOMENTO DEPORTE	13100	LABORAL TEMPORAL	3.271,86
342. INSTALACIÓNS DEPORTIVAS	13100	LABORAL TEMPORAL	5.346,50
432. ORDEAC. E PROMOC. TURÍSTICA	13100	LABORAL TEMPORAL	1.864,27
491. SOCIEDADE DA INFORMACIÓN	13100	LABORAL TEMPORAL	7.312,74
920. ADMINISTRACIÓN XERAL	12000	SOLDOS GRUPO A1	1.653,11
920. ADMINISTRACIÓN XERAL	12001	SOLDOS GRUPO A2	1.209,22
920. ADMINISTRACIÓN XERAL	12003	SOLDOS GRUPO C1	1.132,14
920. ADMINISTRACIÓN XERAL	12004	SOLDOS GRUPO C2	12.268,36
920. ADMINISTRACIÓN XERAL	12006	TRIENIOS	1.022,67
920. ADMINISTRACIÓN XERAL	12101	COMPLEMENTO ESPECÍFICO	8.534,96
920. ADMINISTRACIÓN XERAL	13000	RETRIBUCIÓNS BÁSICAS	1.969,95
920. ADMINISTRACIÓN XERAL	13002	OUTRAS REMUNERACIÓNS	741,44
920. ADMINISTRACIÓN XERAL	13100	LABORAL TEMPORAL	596,94
931. POLÍTICA ECON. E FISCAL	12000	SOLDOS GRUPO A1	1.653,11
931. POLÍTICA ECON. E FISCAL	12003	SOLDOS GRUPO C1	2.264,28
931. POLÍTICA ECON. E FISCAL	12004	SOLDOS GRUPO C2	4.718,60

931. POLÍTICA ECON. E FISCAL	12006	TRIENIOS	553,00
931. POLÍTICA ECON. E FISCAL	12101	COMPLEMENTO ESPECÍFICO	5.056,78
932. XESTIÓN DO SISTEMA TRIBUT.	12000	SOLDOS GRUPO A1	1.653,11
932. XESTIÓN DO SISTEMA TRIBUT.	12006	TRIENIOS	78,93
932. XESTIÓN DO SISTEMA TRIBUT.	12101	COMPLEMENTO ESPECÍFICO	1.324,40
TOTAL			319.563,07

**Segundo.-** Facultar ao alcalde don Santiago V. Amor Barreiro para cantas actuacións de trámites sexan precisas para a mellor execución do acordado.

**Punto Cuarto.- Adopción de acordo de saída do Concello de Ames da Fundación Pública Refuxio de Animais de Santiago de Compostela.**

Intervén a concelleira delegada de Medioambiente, Sanidade e Cultura dona **Mª Eugenia Martín Vicente** para introducir substancialmente o asunto.

Intervén a concelleira dona **Pilar Candocia Pita** para solicitar que o asunto quede sobre a mesa, co fin de ter tempo e ampliar a documentación para estudalo mellor e mesmo contemplar a posibilidade de presentar unha proposta alternativa.

O señor alcalde don **Santiago V. Amor Barreiro** lle informa que tras o debate do asunto esta petición será sometida a votación.

(.....)

Rematadas as intervencións, o pleno da corporación, por unanimidade dos seus membros presentes, acorda que este asunto quede sobre a mesa.

**Punto Quinto.-Aprobación definitiva do Plan Especial de Infraestruturas e Dotacións para implantación de dotación escolar no Milladoiro.**

(.....)

Rematadas as intervencións o pleno da corporación, por unanimidade dos seus membros presentes, adoptou os seguintes acordos :

**Primeiro.-** Aprobar definitivamente o Plan Especial de Infraestruturas e Dotacións (PEID) formulado polo concello de Ames para o establecemento e ordenación dun equipamento público destinado a uso dotacional público escolar e os espazos libres públicos e aparcadoiros a este vinculados, así como a determinación do trazado e características das correspondentes redes de servizos.

O documento para a aprobación definitiva ten data de xuño de 2012 e se corresponde co aprobado provisionalmente por acordo de Xunta de Goberno Local de 5 de xullo de 2012

**Segundo.-** Notificar ós interesados no procedemento o presente acordo de aprobación definitiva.

**Terceiro.-** Publicar o acordo de aprobación definitiva no prazo dun mes no Diario Oficial de Galicia ós efectos previstos no artigo 92.1 da Lei 9/2002 de 30 de decembro de Ordenación Urbanística e Protección do Medio Rural de Galicia. (LOUGA). Publicar tamén o acordo de aprobación definitiva xunto coa normativa e as ordenanzas no Boletín Oficial da Provincia ós efectos previstos no artigo 92.2 da

Lei 9/2002 de 30 de decembro de Ordenación Urbanística e Protección do Medio Rural de Galicia.(LOUGA).

**Cuarto.-** Comunicar ó acordo de aprobación definitiva, acompañado dunha copia autenticada con todos os planos e documentos que o integran debidamente dilixenciados pola secretaría da corporación, á Consellería de Medio Ambiente, Territorio e Infraestruturas da Xunta de Galicia, ós efectos previstos no artigo 92.3 da Lei 9/2002 de 30 de decembro de Ordenación Urbanística e Protección do Medio Rural de Galicia.(LOUGA).

**Quinto.-** Facultar ao alcalde don Santiago V. Amor Barreiro para cantas actuacións de trámites sexan precisas para a mellor execución do acordado.

#### **Punto Sexto.- Aprobación da Conta Xeral 2011.**

(.....)

Rematadas as intervencións o pleno da corporación, por maioría absoluta dos seus membros, cos votos a favor dos 11 representantes do grupo municipal popular e a abstención dos restantes membros da corporación municipal, adoptou os seguintes acordos :

**Primeiro.-** Prestar aprobación á Conta Xeral do concello de Ames correspondente ao exercicio 2011.

**Segundo.-** Facultar ao alcalde don Santiago V. Amor Barreiro para cantas actuacións de trámites sexan precisas para a mellor execución do acordado.

#### **C) PARA CONTROL DO GOBERNO:**

##### **Punto sétimo.- Moción do grupo municipal socialista sobre medidas do Concello de Ames fronte aos desafuzamentos.**

Toma a palabra o señor alcalde don **Santiago V. Amor Barreiro** para dicir que con respecto a este punto hai unha proposta de acordo consensuada por todos os concelleiros da corporación.

Intervén a concelleira dona **Pilar Candocia Pita** para dicir: Como en todas as ocasións nas que se chega a un acordo, partimos de posicións diferentes. Esta é unha moción presentada polo grupo municipal socialista, e sobre o mesmo asunto nós tiñamos tamén unha preparada, que queríamos presentar polo procedemento de urxencia, porque non nos dera tempo de presentala en prazo, que ía mais referida tamén aos desafuzamentos de alugueiro, por iso se cita tanto a Cáritas Milladoiro, xa que eles fixeron unha proposta que entregaron a todos os grupos, que daba a voz de alarma de que estaba habendo tres desafuzamentos de alugueiro por semana no Milladoiro, polo que había un problema grande nesa localidade, pero efectivamente que hai que contar tamén con Cáritas Bertamiráns.

A nós nos gustaría que constara en acta a nosa posición sobre este asunto, porque tal e como queda esta non é a nosa posición, pero cremos que con isto se avanza, e atopar unha postura de consenso para avanzar sempre é importante. Nós cremos que estamos vivindo un dos momentos máis difíciles, vendo que os veciños sofren ao perder a súa vivenda, que é case o máximo que se pode perder e que en moitos casos levou a o suicidio. Creemos que a intervención feita dende o Estado, polo Partido Socialista no seu momento, e logo polo Partido Popular, foi para resolver o problema da Banca, que foi quen creou o problema, mais que para resolver o problema das veciñas e veciños. Pensamos que se non chega a ser por Stop desahucios e porque os medios de comunicación nos fixeron abrir os ollos a todos poñéndonos os mortos diante cando estabamos comendo, ao mellor agora seguíamos mirando para outro lado. Nós entendíamos que era moi importante que

aparecera especificada a dación en pago, porque é verdade que existe ese protocolo, pero tamén xa hai informes de que non está funcionando ben ou hai moi pouca xente que se acolle a el, porque a maioría dos casos non entran nese protocolo. Queremos un compromiso claro do concello no que se refire a poder mediar coas entidades financeiras coas que está traballando para que non fagan desafiuzamentos desa maneira. Para nós é moi importante que se cree unha comisión na que esteamos todos, hai un compromiso de que se cree en dous meses, e aí imos tratar do traballo que vai facer o concello de Ames, e pensamos que hai que contar con Cáritas, con Stop desahucios e con todo o mundo, como non podería ser doutra maneira.

Nos felicitamos de que haxa un paso adiante e parece que neste pleno os acordos veñen sempre polo Nadal, porque lembro que o ano pasado tamén houbera un acordo pola taxa de comedores nestas datas. A ver se conseguimos que nos meses de xaneiro, febreiro, etc... haxa tamén acordos, que non é necesario que sexa Nadal para poder ter espírito construtivo. A nosa posición é sempre a de buscar acordos, xa saben que tendemos a man dende o primeiro día e a seguimos tendendo, pero tamén queremos que conste en acta cal é a nosa posición sobre o tema, porque é razoable que conste a de cada un e porque indica que fomos quen de facer un exercicio de responsabilidade para acadar unha proposta conxunta.

Intervén a concelleira do grupo municipal socialista dona **Isabel González Cancela** para dicir: Como ben dicía Pilar, esta moción que presentou o grupo municipal socialista xa na comisión informativa correspondente acadou un acordo, e no día de hoxe as tres forzas que conformamos a corporación fomos quen de deixar as posturas políticas a un lado, dada a situación que estamos a vivir en todo o país e estamos vendo todos os días nos medios de comunicación e tamén no noso concello, que por desgraza é referente neste asunto, sobre todo no Milladoiro, onde hai moita xente inmigrante que neste mal momento económico no que familias enteiras están sen traballo, moitas veces antes que pagar o alugueiro dánlle de comer aos fillos ou os levan ao colexio, e ao final rematan como acabamos vendo, suicidándose ante a posibilidade de que os veñan botar da casa da que nalgún momento puideron hipotecarse ou alugar, que a día de hoxe son incapaces de facer fronte. Esta non é a nosa moción, tal e como a presentamos, pero entendemos que cando queremos chagar a un pacto, como neste caso, que eu creo que era o mais importante, todos temos que ceder e así o fixemos. Eu espero que esta comisión que formemos, onde os tres grupos esteamos representados, aparte de Cáritas e técnicos, poda axudar á xente, traballando nun tema que creo que nos afecta a todos, sexamos de esquerdas ou de dereitas. Eso si, espero que este acordo non sexa o último, porque penso que neste concello podemos chegar a moitos acordos, sobre todo en asuntos sociais, xa que é un concello específico neste tema, e creo que en todo o que poidamos traballar xuntos, mais alá das ideas, é chegar a bo fin, así que tamén quero felicitarnos por ter chegado a isto.

Toma a palabra o señor alcalde don **Santiago V. Amor Barreiro** para dicir: Tamén eu quero felicitarnos por ter chegado a acordo neste tema tan delicado como é o dos desafiuzamentos.

Rematadas as intervencións o pleno da corporación prestou aprobación por unanimidade á moción fronte aos desafiuzamentos, cuxo texto, unha vez consensuado por todos os membros da corporación municipal, resulta do seguinte teor literal:

## **Moción sobre medidas do concello de Ames fronte aos desafiuzamentos**

### **Exposición de motivos**

Coa crise e o aumento alarmante do desemprego, centos de miles de familias están a chegar a unha situación límite que non lles permite cubrir as súas necesidades máis básicas. O Concello de Ames non é alleo a este fenómeno, xa que continúan a producirse cada día máis casos de familias completas con todos os seus membros no paro, familias que ven como un dos seus maiores logros, a súa vivenda, pode estar en perigo por unha execución hipotecaria que pode provocar a perda do inmovible. E aínda por riba de perder a vivenda, estarán expostos a unha condena financeira de por vida.

No procedemento xudicial hipotecario a vivenda pódase e a Lei de Enxuiamento Civil establece que, no caso de non presentarse poxadores, algo que acontece na maioría dos casos, o banco ou a entidade prestamista pode adxudicarse a vivenda polo 60% do valor da taxación. É dicir: non só poden quedar coa vivenda por un prezo moito menor do que se taxou ao firmar a hipoteca, senón que ademais unha boa parte da débeda mantense (unha vez descontado o valor polo que se poxou a vivenda), incrementada por grandes gastos xudiciais e honorarios profesionais. Ademais, como resultado de todo iso, aos debedores embárganselles os bens e ingresos, tanto presentes como futuros, para saldar a totalidade da débeda.

Esta lexislación, que non se aplica noutros países, era descoñecida polas familias cando rubricaron as hipotecas. Así, a situación é aínda máis grave, xa que pode considerarse que os hipotecados se viron sometidos a unha publicidade enganosa, sometidos á sobrevaloración das taxacións das vivendas e tamén, a unha linguaxe pouco doada de comprender nos contratos que firmaron.

Hoxe en día, calquera non pagamento pode supoñer o vencemento anticipado de todo o que adebedan, e nos contratos que firmaron agochábanse numerosas cláusulas abusivas, como as do só - teito, ou dos intereses moratorios, que oscilan entre o 18 e o 20 por cento.

Por todo o exposto, considérase que se está a vulnerar un dos dereitos fundamentais dos cidadáns, o da vivenda. O artigo 47 da Constitución di que “Todos os españois teñen dereito a unha vivenda digna e adecuada e que os poderes públicos promoverán as condicións necesarias e establecerán as normas pertinentes para facer efectivo este dereito, regulando o uso do solo de acordo co interese xeral para impedir a especulación”.

A perda da vivenda tamén leva consigo a perda doutros dereitos e impide ás persoas afectadas realizarse no ámbito familiar, e profesional, e condena en moitos casos á marxinación e exclusión social.

En definitiva, a situación de desamparo na que se atopan algunhas das nosas familias, asfixiadas por unha situación laboral cada vez máis insostible e unha hipoteca froito da avidez de especuladores e entidades financeiras, é moi preocupante.

Polo tanto, faise necesario intervir con urxencia ante esta dramática situación, que levou a horrorosos desenlaces coa perda de vidas, e que coa duración prolongada desta crise inhumana, estase a agravar día a día.

Ao igual que antes noutros Concellos como Silleda ou Ares, e mentres non se cambie desde os órganos competentes estatais a lexislación sobre desafiuzamentos (recentemente sinalada incluso por instancias europeas como non garante dunha necesaria protección eficaz dos consumidores fronte a posibles cláusulas abusivas das hipotecas), desde o Concello de Ames queremos aportar as medidas necesarias no ámbito municipal para evitar que se produzan mais desafiuzamentos.

Por todo o exposto, somete para a súa aprobación a adopción dos seguintes acordos:

**PRIMEIRO.-** Instar ao Goberno do Estado, a avanzar na defensa das persoas



*debedoras hipotecarias vulnerables, consolidando e mellorando o novo marco xurídico á vez que se facilitan vivendas de aluguer social para quen perderon os seus fogares.*

**SEGUNDO.-** *Instar ao Goberno do estado para que se adopten todo tipo de medidas tendentes a que os poderes públicos dean cumprimento efectivo ao mandato do art. 47 da Constitución Española, e se estuden saídas xustas á cuestión das vivendas baleiras.*

**TERCEIRO.-** *Dar traslado destes acordos ao Parlamento Autonómico de Galicia, así como ao Congreso e ao Senado.*

**CUARTO.-** *Máis aló das medidas de competencia estatal, propor a adopción das seguintes medidas para emprender a nivel municipal:*

*4.1. Estudar a Eliminación do imposto municipal de plusvalía para as persoas afectadas que sufran a perda da súa vivenda en poxa, e para aquelas que logren a dación da vivenda en pago, naqueles supostos en que a lei así o permita.*

*4.2. Ampliar os protocolos de actuación de Servizos Sociais nos casos de desafiuzamento, e colaboración á hora de pedir aos xuíces a suspensión do desafiuzamento cando este sexa por motivos económicos e se refira á vivenda única e habitual.*

*4.3. Adherirse e vixiar o Cumprimento do Código de Boas Prácticas que é de obrigado cumprimento e que foi aceptado polo 100% das entidades financeiras de Galicia.*

*4.4. Colaboración dos servizos xurídicos do Concello en todos os casos que o requiran.*

*4.5. O Concello de Ames establecerá contacto con Cáritas Milladoiro e Bertamiráns e coa Plataforma de Afectados/as pola Hipoteca (PAH), así como cos técnicos dos Servizos Sociais para axudar ás persoas afectadas e para asesorar a actuación municipal.*

*4.6. o Concello de Ames constituirá no prazo de 2 meses unha comisión entre as forzas con representación para programar a actuación do Concello, avaliando todas as posibilidades efectivas de protección da xente afectada, valorando a creación dun organismo de xestión municipal de vivenda social en aluguer como propoñía Cáritas. Esta comisión terá entre os seus cometidos a mediación entre as persoas afectadas e as entidades financeiras ou propietarios da vivenda, así como vixiar a actuación das entidades financeiras e bancarias*

**QUINTO.-** *Facultar ao Alcalde-Presidente para exercer as accións legais que procedan en defensa dos dereitos da veciñanza de Ames.*

**Punto oitavo.- Moción do grupo municipal socialista instando ao Goberno de España a excluír as persoas físicas como suxeitos obrigados das taxas xudiciais.**

O señor alcalde don **Santiago V. Amor Barreiro** cede a palabra ao grupo propoñente da moción, intervindo o concelleiro do grupo municipal socialista don **José Francisco Doval Galán** para dicir: Boas tardes a todas e todos. O día 21 de novembro era aprobada a lei 10/2012, que pasou a ser efectiva ao día seguinte, pola que se regulamentan determinadas taxas no ámbito da Administración de Xustiza e do Instituto Nacional de Toxicoloxía e Ciencias Forenses. Esta é unha lei que sufriu unha tramitación parlamentaria non tan negociada como acabamos de ver aquí,

chegando a ese incremento nas taxas xudiciais e suprimindo do noso ordenamento xurídico a Lei 25/1986, do 24 de decembro, de Supresión das Taxas Xudiciais, pola que as persoas físicas non pagaban taxas xudiciais, taxas que eran simplemente para empresas e no ámbito contencioso administrativo e civil, non no social, ao que se amplía agora.

Seguidamente da lectura ao texto íntegro da moción presentada, tras o cal di: esta é a moción que nós presentamos e estes son, en principio, os catro puntos que propoñemos para que se trasladen ao goberno central, co fin de que as persoas físicas sexan excluídas do pago de taxas xudiciais.

Intervén a concelleira dona **Olalla Alvite del Río** para dicir: Con igual ton construtivo ao da anterior moción, este, ao noso parecer, ben podería ser outro punto que saíra adiante por unanimidade, sería moi razoable. Esta nova normativa que saíu adiante dende Madrid, para nós vai provocar a eliminación desa máxima de que todos, en principio, sexamos iguais ante a xustiza, o que suporá que dependendo dos medios económicos que teña unha ou outra persoa, poida acceder ou non a ela.

Na última intervención o alcalde empregou unha expresión que para min resultou forte. Falaba de que lles toca xestionar a miseria, isto non sei se é unha miseria ou non, pero como sigamos por este camiño será peor que a miseria. Todas as medidas que se toman, unha tras outra, son sangrar e sangrar ao cidadán, ate que isto revente non sei moi ben por onde. Cóllese o camiño fácil e se toman este tipo de medidas non sei se pensando en frío, non sei se vendo mais alá do que poden supoñer ou non. Esta mañá nós falabamos cunha veciña cuns problemas económicos tremendos da cuestión do lixo, sobre a posibilidade de ir aos xulgados, e vai depender de se ten que pagar ou non, e iso en principio non é xusto, non é xusto que dependendo de se unha persoa ten medios económicos ou non, teña ou non dereito a acudir á xustiza. Así creamos cidadáns de primeira e de segunda. Sendo sensatos, este podería ser un punto que saíra, como o anterior, por unanimidade.

Intervén o concelleiro do grupo municipal socialista don **José Francisco Doval Galán** para dicir: En canto a esta lei, se pode resumir en que é una lei de carácter disuasorio, recadatorio e discriminatorio. Disuasorio para evitar que a xente acceda á xustiza para defender os seus dereitos. Co problema que ten a xustiza, grande cantidade de casos e poucos medios en canto ao desenvolvemento do seu traballo, con esta lei se intenta disuadir á xente para que acceda a ela. O fin é recadatorio porque outro medio de solucionar o problema da xustiza é obrigando aos cidadáns que queiran defender os seus dereitos a pagar por acudir a ela. Discriminatorio porque aínda que existan exencións nesta lei para aqueles que poidan demostrar que non poden pagar as taxas, existe unha parte moi ampla da poboación que, sen poder demostrar que merecen esa exención, non poden pagalas. Hai un momento falabamos dun caso moi habitual, no ámbito contencioso-administrativo como pode ser no caso de Ames o asunto do lixo; neste momento para o cidadán acceder a un recurso contencioso-administrativo abreviado son 200 euros e ordinario 350 euros, e isto para un caso que é moi habitual. Sabemos tamén que moitas veces por casos de erros, mala interpretación, na Administración se cometen inxustizas, e moitas veces non se rectifican, como por exemplo no caso do lixo. Moita xente, por 200 euros máis o que lle poda subir porque hai unha taxa fixa e outra variable, ao mellor queda indefenso.

Temos casos moi habituais en todos lados. Nos pode ocorrer a calquera. Por exemplo, un accidente de tráfico no que a persoa quede tetraplética e pida como indemnización 1.300.000 euros, simplemente poñer en funcionamento ese caso serían 6.050 euros, máis dun millón das antigas pesetas simplemente empezar a reclamación, e non digamos xa se se chega a un recurso de apelación ou de casación, que serían 800 ou 1.200 euros. Tampouco é nada estraño que teñamos que recorrer á xustiza por un tema de herencia, á persoa que reclame 600.000 euros,

poñer o caso en marcha lle supón 3.300 euros.

Unha simple multa de tráfico das de 100 euros, das que non supoñen que retiren o carnet, se se quere recorrer, son 200 euros; en definitiva, supón indefensión, ten carácter disuasorio, a maioría da xente non vai ter acceso á xustiza ou se vai ver con moitas dificultades para acceder a ela.

As taxas teñen un incremento enorme, no caso das persoas xurídicas supoñen un incremento mínimo dun 66 % e poden chegar ao 750 %, pero para as persoas físicas é do 100%, ou sexa que se pode pasar de 0 a 750 euros, ou de 0 a 500 euros nun suplicatorio, ou de 0 a 1.200 en recurso de casación. Por tanto entendemos que todo o mundo debe ter garantida, tal e como recolle o artigo 24 da Constitución, a tutela xudicial efectiva, tutela que neste momento se está vendo claramente prexudicada.

Intervén o voceiro do grupo municipal popular don **Ramón García Argibay** para dicir: A verdade é que esta lei que entrou en vigor en novembro non é posiblemente a mellor delas. Cando falamos desta situación vemos que, sobre todo os que probablemente teñan que facer uso dela, se van atopar considerables modificacións con respecto ao que había antes. Dito isto tamén hai que dicir que ten cousas positivas, as lexislacións se fan unhas con maior éxito e outras con menos, unhas con mellor intención e outras con non tan boas, pero a min me gustaría dicir que cousas positivas ten esta lei, porque o negativo xa o destacaron vostedes.

Por exemplo, cando falamos de xustiza gratuíta se eleva a cantidade, antes eran 14.900 euros e agora son 15.900, e aparte exento de taxas, por tanto hai un aumento en canto aos beneficiarios da xustiza gratuíta. Cando se fala de que a xente con poucos medios económicos non se vai poder defender non é exacto. Non estou dicindo que non estea de acordo con parte das cousas que se dixeron aquí, pero non é exacto, porque sendo beneficiario da xustiza gratuíta incluso o listón se eleva en algo mais de 1.000 euros, por tanto ten unha parte positiva.

Os procesos penais tamén están exentos, a primeira instancia no ámbito social, e os procesos de capacitación e filiación de menores, e, por suposto, a protección dos dereitos fundamentais. No ámbito civil os xuízos monitorios e os verbais inferiores a 2.000 euros, o que tamén é un aspecto positivo desta normativa.

E tamén hai que ver o tema económico, porque moitas veces tendemos a compararnos con outros países do noso entorno e cando se fai haino que facer sempre, non só cando nos convén.

Dou un dato: O goberno estima que a recadación por taxas non supera un 10% do presuposto total, e nos países do noso entorno se acerca ao 30%, incluso en países como Alemaña ao 45%. Polo tanto hai unha cuestión a ter en conta, que é que este artigo persegue basicamente é que o 90%, por exemplo, dos recursos de casación, estean confirmados na primeira sentenza, e que os recursos de apelación acaden o 75%. Por tanto o que persegue é acabar co abuso nestas cuestións, porque sabemos que moitas veces se produce o caso, que moitas veces vivimos no concello, de que determinados tipos de recursos se van dilatar no tempo para frear a acción xudicial, e iso todos sabemos que ten un custe elevado.

Intervén a concelleira dona **Olalla Alvite del Río** para dicir: Está ben que recoñezan as partes negativas, que eu creo que son bastantes mais que as positivas, por exemplo menciona como positivo o caso das exencións, e supoño que non é nada

positivo con respecto ao que temos agora, se xa o temos ¿que hai de positivo?

Ao comparar con outros países estou de acordo que hai que comparar en todo. En Alemaña, por exemplo, fáleme de cal é o soldo mínimo medio, ou nos outros países do entorno que di, que non sei a cales se refire. A argumentación de acabar co abuso a min non me vale. Usan a mesma argumentación do copago dos medicamentos, ¿realmente a xente collía medicamentos que non lle facían falla ou a xente estaba abusando da sanidade pública? ¿ía de mais ao médico, etc., etc., ? Son argumentacións que non nos valen, porque non son reais, e co da xustiza, igual. O feito de que toda a Xudicatura xa se pronunciara e alzara documentos importantes e destacados en contra desta normativa, supoño que algo significará. Unha vez mais vostedes viven na súa realidade. Mantemos que isto supón que a cidadanía deixe de ser igual ante a xustiza, porque aínda que haxa persoas sen recursos absolutos que estean exentas e así poidan acceder á xustiza, tamén haberá quen non estea nesa situación límite e que non poidan dispor de tres mil e pico euros para ir aos xulgados por cuestións dunha herencia, así que manteño que isto vai crear diferenzas entre a cidadanía de cara ao acceso á xustiza.

Recoñecen as partes negativas desta normativa, as positivas eu non as vexo, o caso das exencións non aporta nada positivo ao que temos. É un exemplo mais de solucionar a conta da xente, de non ter consideración en absoluto e non ver a realidade como está. A miseria da que falaban antes.

Intervén o concelleiro do grupo municipal socialista don **José Francisco Doval Galán** para dicir: A lei ten excepcións, que antes non facían falla porque a xente non pagaba, tiña acceso gratuíto á tutela xudicial. Se agradece, por exemplo, que un traballador vexa rebaixado nun 60% un recurso de suplicación, algo que antes era gratuíto, e en lugar de pagar 500 euros pase a pagar 200, pero é que antes non os pagaba. Ou que no recurso de casación un traballador pague 300 euros en lugar dos 750 que se piden, pero é que antes tampouco os pagaba. Son excepcións, pero dentro dunha lei que no propio preámbulo recoñece que estas taxas o que buscan é aportar maiores recursos que permitan unha mellora no financiamento do sistema xudicial

De acordo que o sistema xudicial necesita un mellor funcionamento, e non sei se esta é a medida para financialo ou para melloralo, pero seguro que hai mellores medidas e mais axeitadas en lugar de dar este “taxazo”, como o define moita xente, que o que supón é un prexuízo serio para que a maioría dos cidadáns poidan acceder á xustiza. De feito, facendo referencia ao artigo 24 da Constitución, hai quen di que se pasou a unha tutela *en efectivo*, porque a cantidade de pagos nas taxas, nalgún caso é tan desproporcionado que impide á maioría da xente acceder á xustiza. Antes, ademais, teño entendido que se tiña dereito á xustiza gratuíta dun xeito individual, mentres que agora se ten en conta a unidade familiar. Dous xubilados, por exemplo, que cobren pensión e teñan unha finca, se consideraría que poden pagar as taxas. Hai casos en que non lles van recoñecer esa exención, moita clase media e media-baixa vai ter serias dificultades para acceder á xustiza e non van poder demostrar que teñen dereito á exención.

Sería interesante chegar a algún tipo de acordo con isto porque supón un cambio significativo na lexislación española e no concepto que se tiña dende a Lei 25/1986, do 24 de decembro, de Supresión das Taxas Xudiciais. Haberá que ver por que medios, e estudando mais a fondo, se pode axilizar o funcionamento da xustiza, ver tamén por que medios, nos casos de abuso, se pode controlar, pero a aplicación deste tipo de taxas, que ademais hai que pagar previamente, non parece a mellor solución.

Intervén o voceiro do grupo municipal popular don **Ramón García Argibay** para dicir: Estamos falando de que esta non é a mais afortunada das leis que se poidan facer, e por iso este grupo vai votar abstención para facilitar que esta moción saia aprobada.

Dito isto, nós queremos deixar patente que esta lexislación ten cousas positivas. Tamén quero facer unha puntualización á compañeira Olalla Alvite, porque ás veces tendemos a facer comparacións, e creo que non é a mellor comparación facelo coa Sanidade Pública porque non se parecen absolutamente en nada. Na Sanidade Pública, en canto ao tema das receitas e o copago, foi unha medida que houbo que impoñer porque estaba en grave risco a función sanitaria no noso país. É unha cuestión que todos temos moi claro que é básico, a sanidade e a educación deben formar parte do acceso inmediato de calquera persoa que viva no noso país, por tanto creo que non é o mais afortunado.

E nos vivimos a realidade, e por iso nos imos abster e non imos votar en contra desta moción, que sería probablemente o mais fácil para que vostedes tiveran mais argumentos e nos criticaran. A explicación da abstención é porque aínda que esta lei ten aspectos positivos, consideramos tamén que ten cousas moi negativas.

Rematadas as intervencións o pleno da corporación prestou aprobación por maioría simple, cos votos a favor dos membros presentes do grupo municipal socialista e das/os concelleiras/os non adscritas/os presentes, e a abstención dos membros do grupo municipal popular, á moción instando ao Goberno de España a excluír as persoas físicas como suxeitos obrigados das taxas xudiciais, do seguinte teor literal:

***Moción instando ao Goberno de España a excluír as persoas físicas como suxeitos obrigados das taxas xudiciais***

***Exposición de motivos***

*O pasado 22 de novembro entrou en vigor a lei 10/2012, do 20 de novembro, pola que se regulan determinadas taxas no ámbito da Administración de Xustiza e do Instituto Nacional de Toxicoloxía e Ciencias Forenses.*

*Tras unha tramitación de vertice no Parlamento, o seu contido constitúe unha mostra máis da vontade do Goberno de cuestionar o exercicio efectivo dos dereitos fundamentais.*

*A Lei 25/1986, do 24 de decembro, de Supresión das Taxas Xudiciais, erradicou do noso ordenamento xurídico a figura da taxa xudicial, para propiciar que todos os cidadáns puidesen obter xustiza calquera que fose a súa situación económica ou a súa posición social.*

*Mediante a contrarreforma emprendida polo Grupo Popular, este cambio normativo tan radical prodúcese sen aceptarse ningunha proposta dos Grupos Parlamentarios ao longo da súa tramitación en ambas as dúas Cámaras e contra o criterio do Grupo Socialista, ao estenderse o pagamento de taxas xudiciais a toda persoa natural e xurídica, así como ás ordes xurisdicionais civil, contencioso administrativo e social.*

*Se ben o Tribunal Constitucional en STC 20/2012 do 16 de febreiro de 2012 considerou constitucional a reintrodución da taxa feita pola Lei 53/2002, do 30 de decembro, tamén afirmou que "Esta conclusión xeral só podería verse modificada se se mostrase que a contía das taxas.../..., son tan elevadas que impiden na práctica o acceso á xurisdición ou obstaculízano nun caso concreto en termos irrazoables, atendendo aos criterios da xurisprudencia expostos no fundamento xurídico 7. Non obstante, a contía das taxas non debe ser excesiva, á luz das circunstancias propias de cada caso, de modo que impida satisfacer o contido esencial do dereito de acceso efectivo á xustiza". En consecuencia, a contía das taxas non debe impedir ou obstaculizar de xeito desproporcionado o acceso á xurisdición.*

*Recentemente, o Sr. Manuel Cachón Cadenas, Catedrático de Dereito Procesual da Universidade Autónoma de Barcelona, dicía que: "Se o lexislador, mediante a imposición de taxas xudiciais ou doutra forma, pon dificultades para que un cidadán que sufriu unha lesión dos seus dereitos poida acudir aos Tribunais a pedir protección, isto significa que ese lexislador está a favorecer a quen lesionou aqueles dereitos. Por iso, a existencia de taxas xudiciais fomenta a morosidade e, en xeral, o incumprimento das obrigas. Na medida que un sistema de taxas xudiciais dificulte a obtención de tutela xudicial, nesa mesma medida está a beneficiar aos que incumpren as súas obrigas. "*

*O obxectivo recadatorio que persegue esta Lei é desproporcionado coa limitación do dereito de acceso á xustiza e pode converterse nun obstáculo impeditivo para a obtención de tutela xudicial efectiva.*

*Por todo iso, o Grupo Municipal Socialista no Concello de AMES somete a votación a seguinte moción para ser aprobada e na que se insta ao Goberno de España a:*

*Adoptar urxentemente as medidas necesarias para excluír as persoas físicas como suxeitos pasivos obrigados ao pagamento das taxas xudiciais, e a garantir que ninguén vexa limitado o seu dereito de acceso á xustiza por non poder facer fronte ao pagamento dunha taxa xudicial.*

*E iso en virtude das seguintes consideracións:*

**Primeira:** *A entrada en vigor da Lei 10/2012, do 20 de novembro, pola que se regulan determinadas taxas no ámbito da Administración de Xustiza e do Instituto Nacional de Toxicoloxía e Ciencias Forenses, obstaculiza e pode chegar a impedir á cidadanía o acceso á Xustiza en condicións de igualdade. É dicir, priva a cidadanía do dereito constitucional á tutela xudicial efectiva.*

**Segunda:** *O obxectivo recadatorio que persegue a nova Lei de taxas é desproporcionado e contradí polo tanto o criterio do Tribunal Constitucional que establece en STC 20/2012 de "o" 16 de febreiro, que "a contía das taxas non debe ser excesiva, á luz das circunstancias propias de cada caso, de modo que impida satisfacer o contido esencial do dereito de acceso efectivo á xustiza".*

**Terceira:** *O réxime de taxas establecido na nova Lei, convértese nun auténtico "repagamento", e consagra un rexeitable modelo de sistema xudicial no que haberá quen poida custear a defensa dos seus dereitos, e quen sufra unha imposibilidade por motivos económicos de acceso á Xustiza.*

**Cuarta:** *Rexeitamos de plano o espírito e os principios da nova Lei de taxas, que fai recaer na cidadanía a responsabilidade da situación da Administración de Xustiza e pretende mellorar a pendencia de asuntos nos Xulgados e Tribunais exclusivamente pola vía de incrementar os custos dos procedementos.*

## **Punto noveno.- Rogos e Preguntas**

### **Rogos.**

Intervén a concelleira dona **Pilar Candocia Pita** para formular o seguinte rogo:

**Primeiro rogo.-** *Nós presentamos un escrito urxindo a que se obrigue aos propietarios do terreo edificable que está fronte ao Galerna, pegado ao edificio de madeira escura que linda co parque, terreo que está en malas condicións e cunha herba altísima á limpalo. Cremos que o goberno pode instar aos propietarios. Nos dician os veciños que ademais, ás veces, cando se fai a limpeza do parque, como iso xa está moi mal, se botan alí os restos, o que está mal feito. Non sei se son os operarios municipais ou a propia empresa, pero en todo caso, que non se faga.*

Intervén a concelleira do grupo municipal socialista dona **Carmen Fraga Crespo** para formular o seguinte rogo:

**Segundo rogo.-** *Un rogo sobre obxectos tirados ao lado dos contedores en varios*

lugares do concello, pero principalmente na miña parroquia, Trasmonte. Eu paso todos os días e dende mediados de setembro están alí as cousas. Rogo que se faga unha revisión por todo o concello onde están ubicados os contedores. Tamén penso que se podería facer unha campaña para concienciar ou informar á cidadanía de que leven as cousas ao punto limpo, ou poñer tal vez un teléfono de información próximo aos contedores para que chamen e veñan recoller este tipo de cousas. A semana pasada colocaron ao lado duns contedores onde xa había outras cousas, colchóns, unha cama vella, muebles, e imaxino que foron recoller esas cousas, pero deixaron as que había de antes: unha defensa e unhas rodas de coche.

Toma a palabra o señor alcalde don **Santiago V. Amor Barreiro** para dicir: Varios veciños de diferentes lugares de Trasmonte chamaron hai poucas semanas para preguntar cal era o teléfono para a recollida de lixo duro; coas rodas pode haber algún problema porque non se poden levar ao punto limpo, pero faremos campaña.

Intervén o concelleiro do grupo municipal socialista don **José Manuel Miñones Conde** para formular os seguintes rogos:

**Terceiro rogo.-** Un rogo dirixido ao concelleiro de obras relativo a que na saída do pavillón de Bertamiráns está caído o espello para ver os coches que veñen pola carretera. Rogo que se arranxe.

**Cuarto rogo.-** Un rogo relativo a farolas. Notifico dalgúns puntos: en Raxoeira levan xa tempo con elas fundidas. Na avenida da Peregrina contaron cerca de dez.

**Quinto rogo.-** Este é un rogo mais particular. Rogaría que se fixera un estudo, se se pode, para inventariar os puntos de luz que hai ao carón do aparcadoiro da parte de atrás do Mercadona en Bertamiráns, porque a visibilidade é bastante mala e o sábado pola tarde sempre aparca alí o camiión de descarga dese supermercado e practicamente non se ve. Precisamente hai dúas farolas sen luz alí, co cal é peor aínda.

Intervén o concelleiro delegado de Vías, Obras, Parques, Xardíns e Patrimonio, don **Alfredo Taboada Alvelo**, para dicir: A grúa que temos se quedou sen cambio e mentres non veña o cambio novo todas as farolas están esperando. Tal pronto como se poda se repararán.

**Sexto rogo.-** En canto a baches, temos notificación de dous puntos concretos; un é onde está a rotonda sen terminar na parte datrás do Centro de Saúde, na Travesía do Pedregal, alí está bastante defectuoso o firme. Outro é na Travesía da Peregrina fronte ao Trópico, ao lado do Galerna. Onde aparcan os coches está todo o tramo afundido.

Intervén o concelleiro delegado de Vías, Obras, Parques, Xardíns e Patrimonio, don **Alfredo Taboada Alvelo**, para dicir: Foi Telefónica quen obrou por alí, non é cousa do concello.

Intervén o concelleiro do grupo municipal socialista don **José Francisco Doval Galán** para formular o seguinte rogo:

**Sétimo rogo.-** Un rogo dirixido ao goberno en xeral. O pasado día 20, en que se celebraron os festivais de Nadal de O Bosque e A Madalena, foron os dous o mesmo día con media hora de diferenza, un xoves. Non sei se pode haber algún xeito para que quede a cousa un pouquiño mellor organizada e non andar ás carreiras dun lado para outro. Mesmo o xoves tampouco é o mellor día. Tanto para pais como para



traballadores mellor sería un venres. Rogo que se faga unha previsión, non o dirixo a ninguén en concreto. Creo que as escolas infantís fan festivais en distintas épocas do ano, tamén no Entroido e fin de curso.

Intervén o concelleiro delegado de Comercio, Promoción económica, Turismo e Educación, don **Bernardo Moar Míguez**, para dicir: As dúas directoras dixeron o mesmo. Parece ser que o venres non había espazos, estaban ocupadas as Casas da Cultura e demais. Eu dixen o mesmo, que non me parecía lóxico que foran os dous practicamente á mesma hora, de feito fun eu solo, e pedín que para o próximo ano que se planifique cun pouco mais de antelación.

### **Preguntas.**

Intervén a concelleira non adscrita dona **Pilar Candocia Pita** para formular as seguintes preguntas:

**Primeira pregunta.-** Non sei a quen dirixir esta pregunta, que se refire á máquina de pasar a revisión do paro, estropeada dende setembro ¿que pasa con iso? Algún veciño xa meteu por escrito algunha reclamación no rexistro, e precisamente agora que hai mais parados, polo menos facilitarlles a revisión, porque teñen que ir a Santiago de Compostela ¿por qué non se arranxou en todo este tempo?

Intervén o concelleiro delegado de Comercio, Promoción económica, Turismo e Educación, don **Bernardo Moar Míguez**, para dicir: Si que se arreglou en varias ocasións, o arranxo funcionou como dous días e se volveu estropear. Bota mais tempo estropeada que funcionando. Insistíremoslle á Xunta sobre este tema.

**Segunda pregunta.-** No colexio de Barouta había un problema cunha parada do transporte escolar, concretamente en Castiñeiro do Lobo ¿está resolto isto a día de hoxe?

Intervén o concelleiro delegado de Comercio, Promoción económica, Turismo e Educación, don **Bernardo Moar Míguez**, para dicir: Non, aínda non.

Continúa a señora **Candocia**: Como non sabíamos en que condicións estaba isto, fago unha pregunta-rogo. O problema, polo que tiña entendido, é que había unha parada á que os pais levaban aos nenos e aparcaban os coches alí. O que piden os pais é que se faga unha parada mais arriba. Son bastantes nenos os afectados, e por experiencia sei que nestas cousas, se o concello intervén directamente coa Dirección de Transportes, se resolve. Se non hai custo a maiores e se a empresa está disposta a facer a parada se facilita que os nenos non teñan que baixar andando e que non se xenere o problema dos coches mal aparcados. Parece ser que a empresa non ten problema en facer a parada e que o condutor dixo que era factible.

**Terceira pregunta.-** Hai un problema cos elementos de xogo do patio. Cando fomos comer alí no mes de maio, o día do celíaco, o director nos dixo que xa lle pasaran ao concello a notificación e que daquela non se puidera arranxar. A nós o que nos di tanto a ANPA como pais que viñeron a facernos a petición, é que está en moi mal estado, o que xa víramos aquel día, ese parque necesita unha modificación ¿sabe o goberno en que situación está iso?

Intervén o concelleiro delegado de Comercio, Promoción económica, Turismo e Educación, don **Bernardo Moar Míguez**, para dicir: En relación ao transporte escolar estiven coa dirección do centro e coa empresa, fomos facer o traxecto, ver onde convida mais, buscar novas ubicacións, incluso tiveron unha xuntanza cos pais de Castiñeiro do Lobo, así que estamos traballando nelo, non é un tema que teñamos esquecido nin moito menos, aparte de que xa non é un problema de coches, policía, etc., é un problema de seguridade para os nenos.

En canto ao relativo ao patio si que me sorprende. Certó é que vimos que as



suxeicións estaban ao aire, á vista, pero se botaron dous sacos de area para cubri-lo, para compactar iso, é algo que falei coa ANPA, á que se mandou un correo electrónico, e entendo que quedou resolto.

Pregunta dona **Pilar Candocia**: ¿Pero iso cando foi? ¿agora?

Continúa o señor **Moar Míguez**: A principios de curso.

Continúa dona **Pilar Candocia**: Pero é que isto está ocorrendo agora, é un asunto que traía eu para preguntas do pleno pasado.

Continúa o señor **Moar Míguez**: A principios de curso xurdiu o problema e resolveuse. Se retrasou un pouco polo problema de que non entraba o camiión alí, pero se resolveu. Non teño constancia de que haxa ningunha noticia mais sobre iso.

Continúa dona **Pilar Candocia**: Pois preguntarei e pasarei mais información.

**Cuarta pregunta.-** Creo que esta pregunta é para a secretaria, porque non sei como vai este tema. Eu estou no consello escolar do colexio Val da Maía, porque nolo repartíramos os grupos ao principio, e por razóns de traballo, neste momento, como poñen un horario no que a min me resulta imposible asistir ás reunións porque tería que pagar a unha persoa para poder ir ¿como é o trámite para facer o cambio para un compañeiro ou compañeira? Porque din no colexio que o que non se pode é suplirme, xa que os membros do consello escolar son membros de pleno dereito, non son representantes de institucións que podan cambiar.

Intervén a concelleira non adscrita dona **Susana Mallo Redondo** para formular as seguintes preguntas:

**Quinta pregunta.-** A última vez que pedín información sobre o estado do Mercadillo do Milladoiro contestoume por escrito o concelleiro que o plan de dinamización ou como lle queiramos chamar, dependía da renovación que se ía producir en novembro das licenzas. As miñas preguntas eran ¿cantos renovaron? e se isto xa se produciu, e se non se produciu por esa confusión que hai entre novembro e decembro, pídlle igualmente que me responda cantos renovaron e cantos novos vendedores temos que asuman os postos que queden vacantes. Cóllelle a oferta e pídlle que nos detalle o plan de intervención sobre o Mercadillo do Milladoiro.

**Sexta pregunta.-** Non sei se esta pregunta é para vostede de novo por ser concelleiro de Educación ou se vai por outra vía; para quen corresponda, son tres preguntas sobre o instituto do Milladoiro: Primeira, ¿cando vai estar listo? porque quero pensar que vostedes teñen a información ao día sobre a situación. Segunda, ¿vai estar operativo no curso 2013-2014?, e se fose a súa contestación negativa ¿motivos polos que non o estaría?

**Sétima pregunta.-** Esta é unha interpelación nominal a cada un dos concelleiros do grupo municipal popular, ten que ser a cada un e entenderán os motivos polo que o digo. Hai uns días, non sei se sendo consciente do que dicía -espero que non- ou cegado polos focos da televisión, o noso alcalde afirmaba en Correo TV que houbo veciños que ao finalizar o último pleno tentaron agredir a concelleiros desta corporación. A nós iso nos parece grave, somos coñecedores da absoluta vontade da plataforma de que as mobilizacións sexan democráticas e respetuosas, pero por suposto se esta afirmación é certa é grave, e se non, é moi grave dicilo nunha televisión local.

Señor Manuel Ferreiro ¿foi vostede agredido por algún veciño de Ames ao final do

último pleno?

Intervén o concelleiro, don **Manuel Ferreiro Santiago** para contestar: de Ames non sei, por algún veciño si.

Continúa dona **Susana Mallo**: Eu pregunteille a vostede ao día seguinte do pleno e me dixo que non, que en absoluto fora agredido.

Continúa o señor **Ferreiro**: me tocaron cun paraugas nunha perna.

Dona María González ¿vostede foi agredida por algún veciño?

Intervén a concelleira dona **María González Gómez** para contestar: Non.

Don Alfonso Rey ¿vostede foi agredido por algún veciño?

Intervén o concelleiro don **Alfonso Rey López** para contestar: Non.

Continúa a señora **Mallo**: Isto parece un interrogatorio, o sinto, pero creo que é importante que cada un diga o que lle pasou ese día. Dona M<sup>a</sup> Eugenia Martín ¿vostede foi agredida por algún veciño?

Intervén a concelleira dona **M<sup>a</sup> Eugenia Martín Vicente** para contestar: Non.

Continúa a señora **Mallo**: Dona Carmen Verde ¿vostede foi agredida por algún veciño?

Intervén a concelleira dona **Carmen Verde Leboráns** para contestar: Non.

Continúa a señora **Mallo**: Señor Emilio Martínez ¿vostede foi agredido por algún veciño?

Intervén o concelleiro don **Emilio Martínez Carballeira** para contestar: Para min sobra esa pregunta.

Continúa a señora **Mallo**: ¿sobra? Pois entón haberá que dicirlle ao señor alcalde que mida as súas palabras.

Continúa o señor **Martínez Carballeira**: Sobra esa pregunta, e é mais, por quen eu me sentín agredido foi por ti ese día cando nos chamaches a todos sinverguenzas.

Continúa a señora **Mallo**: Teño un problema co meu léxico.

Continúa o señor **Martínez Carballeira**: Pois agora entendémolo ben, procura cambialo.

Continúa a señora **Mallo**: Igual se cambian as medidas cambia o meu léxico tamén, pero intentareino. Don Bernardo Moar ¿vostede foi agredido por algún veciño?

Intervén o concelleiro, don **Bernardo Moar Míguez**, para contestar: Eu, que vin traballar esa tarde, non.

Continúa a señora **Mallo**: Don Alfredo Taboada ¿vostede foi agredido por algún veciño?

Intervén o concelleiro don **Alfredo Taboada Alvelo** para contestar: Fisicamente non, pero verbalmente si.

Continúa a señora **Mallo**: Don Ramón García ¿vostede foi agredido por algún veciño?

Intervén o concelleiro don **Ramón García Argibay** para contestar: Eu non fun agredido por ningún veciño nin me sentín agredido en ningún momento, o que me sentín foi ofendido por certas declaracións, sobre todo do grupo do que formas parte, que, cando menos, son inxustas.

Continúa a señora **Mallo**: Don Santiago Amor ¿vostede foi agredido por algún veciño?

Toma a palabra o señor alcalde don **Santiago V. Amor Barreiro** para contestar:

Fisicamente non.

**Oitava pregunta.-** Señor Santiago Amor ¿cónstalle que dona Pilar Candocia instigara aos veciños para agredir a algún concelleiro? Explico esta pregunta; tamén se lle fixo en Correo TV e vostede non o afirmou pero non o negou.

Toma a palabra o señor alcalde don **Santiago V. Amor Barreiro** para dicir: Dona Susana, mire, vostede quere agora facer ver que eu intentei acusar a dona Pilar, o que non é certo. Se eu tivera que acusar a dona Pilar, e creo que dona Pilar me coñece, o tivera feito. Eu non quixen entrar nese tema.

Continúa a señora **Mallo**: O tema presentouno vostede na televisión, porque foi vostede quen dixo á entrevistadora que houbo veciños que tentaron agredir aos concelleiros e había persoas que se agochaban detrás deles instigando, e ela díxolle ¿foi dona Pilar Candocia? e vostede non quixo negalo, entón preguntollo aquí, ten a oportunidade de ser mais claro.

Continúa o señor **alcalde**: Eu podería ter dito nese canle de televisión que concelleiros da oposición foron ao cuartel da garda civil a preguntar como estaba o caso deses incidentes, e non o dixeran ¿verdade?

Continúa a señora **Mallo**: Se trataba dunha persoa da que se rumoreaba que fora agredida, e eu preguntei directamente a esa persoa, e preguntamos na garda civil, pero dígolle que preguntoulle unha periodista e vostede non o negou.

Intervén a concelleira non adscrita dona **Pilar Candocia Pita** para dicir: Alcalde, se saca unha nota de prensa dicindo que hai dilixencias (que sabe que son para asuntos penais) abertas, é normal que preguntemos.

Continúa o señor **alcalde**: Dilixencias que poden ser administrativas, e creo que a pregunta está respostada. Eu non citei a ninguén. Ten a palabra o señor Miñones para formular as súas preguntas.

Continúa a señora **Mallo**: Non, non me contestou, era si ou non, se vostede afirma que Pilar Candocia era a persoa que se agochaba detrás dos veciños para instigalos a agredir, porque iso foi o que dixo, que “había persoas que se agochaban detrás dos veciños” ¿é Pilar Candocia esa persoa? Non me vai contestar, pois creo que ten a obriga legal de contestarme, fágao por escrito, por favor.

Intervén o voceiro do grupo municipal socialista don **José Manuel Miñones Conde** para formular as seguintes preguntas:

**Novena pregunta.-** Hai dúas semanas nos reunimos para falar do POS e se nos dixo naquela reunión que se estudaría e se nos convocaría para a semana pasada ¿se nos vai convocar?

Toma a palabra o señor alcalde don **Santiago V. Amor Barreiro** para contestar: Queremos convocalo proximamente.

Continúa o señor **Miñones**: o problema é que o xoves temos o pleno extraordinario que se terá que celebrar para o POS, así que pedimos que sexa con tempo suficiente.

**Décima pregunta.-** Sabiamos do caso da urbanización de Agro do Muíño, na que resulta que o lixo que se recolle alí o fai o concello, non a empresa adxudicataria, o que está a crear malestar entre os veciños, xa que a recolleita non se fai en días concretos, non saben ben cando vai ser, ademais de non ter os contedores

específicos para esa reciclaxe. A pregunta lóxica é ¿existe xa unha data na que vostedes vaian traer a ampliación do servizo para esas urbanizacións que quedaron fóra?

**Undécima pregunta.-** No tema do Grumir sabemos pola prensa que están vostedes próximos a chegar a un acordo co concello de Brión, e queremos saber ¿este acordo vai chegar antes do día 31? ¿de non facerse antes do 31 que pasará o día 1 de xaneiro se existe algunha urxencia? ¿quen a vai cubrir? xa que se dixo publicamente por parte do alcalde de Brión que non se vai cubrir todo o servizo de urxencias a partir do día 31, é preocupante cando menos para os amienses saber que iso vai ser así. ¿Ten algunha previsión ou alternativa a ese servizo en caso de que non se chegue a ese acordo?

Toma a palabra o señor alcalde don **Santiago V. Amor Barreiro** para contestar: No tema do lixo está practicamente pechado coa empresa de recollida o acordo, e en canto teñamos a data a diremos.

No tema do Grumir, estamos tentando pechar un acordo, estamos pendentes do concello de Brión; entendemos que o servizo non se vai deixar de prestar independentemente de que non teñamos rubricado un documento a partir do 31 de decembro.

**Décimo segunda pregunta.-** Hai varios meses, creo que case un ano, falamos dunha normativa interna dos servizos informáticos para poñer en marcha. Cando preguntei nos meses seguintes se me dixo que estaba practicamente rematada ¿en que estado está actualmente?

Intervén o concelleiro delegado de Persoal, Reforma Administrativa, Servizos e Urbanismo don **Ramón García Argibay** para contestar: Está no mesmo estado por un motivo. A explicación é que como vostede sabe estamos inmersos no cambio do asunto da Administración electrónica. Hai uns procedementos que se están implantando neste caso co SIGEM, que leva a Deputación. Foi hoxe á Xunta de Goberno Local a compra de 32 Pcs, porque fan falla para o sistema que estamos implantando, e estamos á espera de acabar de configurar o CPD, os accesos, etc. Pensamos que é mellor esperar un pouco mais para traer un definitivo onde xa figuren ultimadas todas as políticas de seguridade.

**Décimo terceira pregunta.-** En referencia aos procedementos administrativos ¿non había unha data de terminación que era agora en decembro?

Continúa o señor **García Argibay**: Si, a data de remate era o 31 de decembro, pero como vostede sabe o Plan Avanza deixa certa flexibilidade para seguir implantando o procedemento. No prego había unha cuestión importante que era a formación e implantación, e hai unha persoa, que ven por parte de Informática El Corte Inglés, que vai estar durante todo un ano -estaba definido nos pregos- para levar a cabo a implantación ¿por que? porque os procedementos que estamos implantando requiren formación, requiren tamén no tema técnico certas características, de aí a compra deses Pcs; e logo, hai procedementos, que están nunha fase xa avanzada por parte da Deputación, que se rematarán nunhas semanas ou meses, non sei exactamente cando vai ser, que tamén forman parte dese paquete. Tamén hai unhas melloras que terá que cumprir no seu momento a contrata, que tamén están precisadas nese proxecto. Unha cousa interesante é que nos imos adherir ao portal electrónico da Deputación, o que tamén nos permitirá que todos os procedementos estean encadeados interdepartamentalmente, de tal xeito que a información sexa transversal, non só no departamento no que está instalada.

**Décimo cuarta pregunta.-** Do asunto do cambio para a Deputación de GTT, o outro día presentamos por escrito diferentes preguntas e queremos saber o estado actual dese cambio ¿se fixo a GTT actualmente unha prórroga? porque remataba o contrato

o 31 de decembro, e de ser así ¿por canto tempo? ¿se sabe xa cantas oficinas se van poñer a disposición e o horario das mesmas?

Toma a palabra o señor alcalde don **Santiago V. Amor Barreiro** para contestar: Agora mesmo a empresa GTT segue prestando o servizo porque se está en período voluntario de cobranza. Cando teñamos toda a información lla remitiremos.

Continúa o señor **Miñones**: ¿Aínda non sabemos nin o número de oficinas nin o horario?

Continúa o señor **alcalde**: Cando teñamos a información lla daremos toda xunta. Saiba que van seguir prestando o servizo mentres haxa período voluntario de pago, porque así estaba recollido no prego.

**Décimo quinta pregunta.-** Os concelleiros e concelleiras da oposición ¿temos restrinxido o acceso na Casa Consistorial polas tardes ao noso local?

Toma a palabra o señor alcalde don **Santiago V. Amor Barreiro** para contestar: Vostedes teñen dispoñibilidade das instalacións municipais que solicitan, que son as casas da cultura ou o Pazo da Peregrina.

Continúa o señor **Miñones**: ¿E ao noso local que temos aquí, na Casa Consistorial, podemos acceder polas tardes?

Continúa o señor **alcalde**: Creo que xa hai unha contestación a esa pregunta de principios da lexislatura, o revisaremos e lle daremos traslado.

Intervén a concelleira non adscrita dona **Susana Mallo Redondo** para preguntar: Señor alcalde, unha cuestión de orde, nada mais: a min, ás cuestións do Instituto non me contestou ninguén ¿o van facer por escrito?

Contesta o señor **alcalde** : Si.

Intervén a concelleira do grupo municipal socialista dona **Isabel González Cancela** para formular as seguintes preguntas:

**Décimo sexta pregunta.-** A miña pregunta é sobre o número de teléfono que aparece para o baile de maiores que organiza a concellaría de Atención e Mediación Veciñal. O sábado pasado esa concellaría organizou un baile, e ese teléfono moitas veces non o colle ninguén, outras veces que si contestan non se identifican, non sei si é ou non persoal do concello ¿de quen é ese número de teléfono?

Intervén a concelleira delegada de Atención e Mediación Veciñal dona **Carmen Verde Leboráns** para contestar: Si, é do concello.

Toma a palabra o señor alcalde don **Santiago V. Amor Barreiro** para dicir: En teoría é un teléfono do concello, aínda así o comprobaremos.

Continúa a señora **González Cancela**: No listado que nós temos non aparece por ningún lado.

Intervén o concelleiro do grupo municipal socialista don **José Francisco Doval Galán** para formular as seguintes preguntas:

**Décimo sétima pregunta.-** Recentemente se inaugurou un retablo na Capela da Peregrina, e sabemos que a Cofradía invitou a asistir a todos os concelleiros por medio dun escrito con rexistro de entrada do día 5, pero en cambio a nós non nos chegou invitación ningunha, e polo tanto non puidemos asistir. Nos gustaría saber

¿que pasou para que non nos chegara esta invitación da Cofradía para asistir a esta inauguración do retablo?

Toma a palabra o señor alcalde don **Santiago V. Amor Barreiro** para dicir: Polo que eu sei se traspapelou.

Intervén a concelleira non adscrita dona **Pilar Candocia Pita** para preguntar: ¿Vostedes tampouco foron? ¿como se enteraron?

Continúa o señor **alcalde**: A min me invitou persoalmente o párroco.

Intervén a concelleira delegada de Atención e Mediación Veciñal dona **Carmen Verde Leboráns** para dicir: A min tamén, en Correos.

E non habendo mais asuntos de que tratar o señor alcalde presidente dou por rematado o acto e levantou a sesión ás vinte e tres horas e dez minutos do día 27 de decembro de 2012, de todo o que eu como secretaria certifico.

Vº Prace

A secretaria

O alcalde